

Kuishi Pamoja na Kristo



SABATO MCHANA

Somo la Juma Hili: Kol. 3:1-17, Rum. 1:18, Rum. 6:1-7, Efe. 4:22-24, Kum. 7:6-8, 1 Sam. 16:23.

Fungu la Kukariri: “Zaidi ya hayo yote jivikeni upendo, ndio kifungo cha ukamilifu” (Wakolosai 3:14).

Kwa kawaida inasisitizwa kuwa hatupaswi kukazia fikra sana mambo ya mbinguni; vinginevyo, hatutakuwa wenye manufaa katika dunia. Ingawa ni kweli kwa namna fulani, kuna dhana muhimu kama hii ambayo Paulo anaiangazia katika Wakolosai 3: tukikaza fikra sana katika mambo ya duniani, hatutakuwa na manufaa kwa mambo ya mbinguni kwa Bwana.

Paulo anaelekeza fikra zetu katika kanuni nyingi za kivitendo, za maisha halisi zinazotoka mbinguni na zinazoweza kueleweka tu kwa “waliofufuka pamoja na Kristo” (Kol. 3:1).

Ushauri wa Paulo ni kanuni halisi za kivitendo ambazo zitaimarisha uhusiano wetu wote, na si tu ndani ya kanisa.

Yesu alisema, “Wapendeni adui zenu, waombeeni wanaowaudhi, ili mpate kuwa wana wa Baba yenu aliye mbinguni; maana yeye huwaangazia jua lake waovu na wema, huwanyeshea mvua wenye haki na wasio haki” (Mt. 5:44, 45).

Inaonekana ni jambo lisilowezekana, au sivyo? Kwa mtazamo wa kibinadamu. Tunapaswa kufa kabla hatujaishi kwa ajili ya Mungu. Ndiyo sababu ni lazima tuyafikiri mambo ya mbinguni ikiwa tunatumaini kuwa na manufaa yoyote katika dunia kwa Baba yetu wa mbinguni.

Juma hili tutaona njia ambazo kwazo kuishi pamoja na Kristo kunaweza kuleta mabadiliko, sasa na milele.

**Jifunze somo la juma hili kwa maandalizi ya Sabato ya Machi 14.*

Kuwa na Mtazamo wa Mbinguni

Soma Wakolosai 3:1–4. Ni hali gani ambayo Paulo anaelezea kuwa ya lazima kwetu ili kuwa na mtazamo wa mbinguni? Unadhani hilo linamaanisha nini?

Kutokea katika kilele cha mlima, inawezekana kutazama mandhari kubwa inayokuzunguka. Tangu nyakati za kale, milima imekuwa ikitembelewa na wale wanaotafuta uzoefu wa karibu na Mungu (*tazama Zab. 121:1, 2*). Hata milima iliyotengenezwa na wanadamu, inayoitwa minara ya kale yenye ngazi iliyotumika kama mahali pa ibada, imejengwa na wapagani kwa kusudi kama hilo—ili kukutana na miungu. Cha kuvutia, mji wa Uru, ambao Abramu aliitwa atoke, ulikuwa na mnara mkubwa sana uliotumika kama mahali pa ibada unaoonekana kutoka umbali wa maili nyingi. Lakini kubadilisha mwinuko wa mtu peke yake kamwe hakuwezi kumsogeza mtu yeyote karibu na mbingu katika maana ya kiroho. Juhudi za kibinadamu kamwe zisingeweza.

Badala yake, ni kwa njia ya muujiza wa neema pekee, ambapo tulikufa pamoja na Kristo na kufufuka pamoja Naye (kunakoelezewa kisitiari na ubatizo [*Kol. 2:12, 13*]), ndipo tunaweza kuwa karibu zaidi na mbingu.

Ona kwamba tangu mwanzo wa Wakolosai 3 msisitizo unaorudiwa juu ya yale yaliyo juu, yaani, yale yaliyo mbinguni: “yaliyo juu,” “Kristo aliko,” “yaliyo juu,” “pamoja na Kristo katika Mungu,” “pamoja naye katika utukufu” (*Kol. 3:1–4*).

Kwa hakika, kuna mengi katika maisha ya Kikristo ambayo ni magumu kueleza. Mtu anawezaje “kufa” na “kufufuliwa” wakati, kwa jinsi inavyoonekana, yeye ni mtu yuleyule na hajawahi kuwa na uzoefu huo wa uzima na mauti? Kuna mengi ambayo hayaeleweki kwa akili ya kawaida, bila kuongozwa na Roho Mtakatifu. Lakini kwa wale wenye mtazamo wa kiroho, kwa sababu wamepokea moyo mpya ulioahidiwa na Mungu, na kuifia dhambi na kufufuliwa pamoja na Kristo ni uhalisi wa kweli. Kama vile wimbo unavyohibitisha: “Hivi ndivyo ni juavyo? Yu hai ndani yangu.”

Hata hivyo, Paulo anatoa amri hizi kwa sababu kuna hitaji la kudumu la maisha haya ya kiroho kufanywa upya (*tazama 2 Kor. 4:16*). Kwa kweli, tunaweza, kuasi na kupotea! Na kamwe hatuko salama dhidi ya majaribu katika maisha haya.

Kwa hiyo, ni lazima tuchague kila siku “kutafuta yaliyo juu” (*Kol. 3:1*). Uzima wetu wa milele “umefichwa pamoja na Kristo katika Mungu” (*Kol. 3:3*), lakini udhihirisho wa nje wa maisha hayo utafichwa.

Mawazo yako yako wapi: kwa kawaida juu au kwa kawaida chini? Ikiwa ni la mwisho, unabadilishaje mwelekeo wake?

Komesha Kuwa wa Kidunia

Tunasikia kauli mbiu nyingi leo: “Komesha vita!” “Komesha ukataji miti!” “Komesha silaha za nyuklia!” Lakini moja ambayo huenda hatujawahi kusikia ni “Komesha Kuwa wa kidunia!” Hiyo haiendani na utambuzi wa ulimwengu wetu. Si kwamba yoyote katika kauli mbiu zingine hizo si sahihi au wanachokitetea si sahihi. Wao ni watu wasioona mbali sana, wakizingatia ukaribu wa umilele. Mtazamo wetu unapaswa kuwa wa juu zaidi, milele.

Soma Wakolosai 3:5, 6 (*tazama pia Rum. 6:1–7*). Tunapataje uzoefu wa kile inachomaanisha kuifia nafsi na mtazamo wa kidunia na kuwa hai kwa “yaliyo juu” (*Kol. 3:1*)?

Hata kama tumekufa kiroho pamoja na Kristo, “viungo” vyetu—yaani, majaribu ambayo mwili na akili zetu hutuletea—vinahitaji kufishwa.

Lakini tunapaswa kutambua mambo mawili kuhusiana na amri hii.

Kwanza, katika Wakolosai 3:1, muundo wa Kiyunani anaotumia Paulo unathibitisha kwamba, kwa hakika, tumefufuliwa pamoja na Kristo. Pili, amri katika Wakolosai 3:5 ni matokeo ya ukweli huo (“Basi”). Tunaweza kufisha mambo ya kidunia (uasherati, uchafu, tamaa mbaya, mawazo mabaya, kutamani, n.k.) kwa sababu tu tumefufuliwa pamoja na Kristo na tuna uzima Wake wa kiroho na uweza wa kuondoa mambo haya katika akili na maisha yetu.

Cha kuvutia, kutokea kwa mara nyingine pekee katika Kiyunani kwa kirai kilekile katika Wakolosai 3:6, “ghadhabu ya Mungu,” ni katika Warumi 1:18. Mungu “huwaacha” watu wazifuata njia zao mbaya, na kwa hivyo hasira Yake pia “inakuja” (*tazama Ufu. 6:16, 17*) “kwa ajili ya mambo hayo” (*Kol. 3:6*). Katika Warumi 1:18, Paulo anarejelea “uasi wote na uovu,” akilinganisha “uchafu” (*kwa kutumia neno lile lile la Kiyunani linalopatikana katika Wakolosai 3:5*) hasa kabisa na watu wanaoendekeza “tamaa za mioyo yao, waufuata uchafu, hata wakavunjiana heshima miili yao” (*Rum. 1:24*).

Wanaivunjiaje heshima miili yao? Kwanza, kwa sababu wanakataa kumtambua Muumbaji lakini pia kwa “tamaa zao za aibu, hata wanawake wakabadili matumizi ya asili kwa matumizi yasiyo ya asili; wanaume nao vivyo hivyo waliyaacha matumizi ya mke, ya asili, wakawakiana tamaa, wanaume wakiyatenda yasiyopasa” (*Rum. 1:26, 27*).

Tunafuataje maneno “basi vifisheni viungo vyenu vilivyo katika nchi” (*Kol. 3:5*)?

Unaofanywa Upya Upate Ufahamu

Soma Wakolosai 3:6–11. Paulo anaendeleaje na mfuatano huu wa mawazo?

Maneno ya kwanza ya Wakolosai 3:8 yanaonesha badiliko kubwa na la wazi toka mauti hadi uzima: “Lakini sasa.” Neno “sasa” katika Kiyunani ni mkazo. Sasa, yaani, kwa sababu mmefufuliwa pamoja na Kristo na kuyatafuta yaliyo juu, maisha yako ya sasa yanapaswa kuonesha tofauti kubwa na maisha yako ya awali. Baada ya kuvifisha “viungo vyenu vilivyo katika nchi” (*Kol.* 3:5), “sasa yawekeneni mbali nanyi haya yote, hasira, na ghadhabu, na uovu, na matukano, na matusi vinywani mwenu” (*Kol.* 3:8).

Hasira na ghadhabu vinaweza kuelezea mwitikio wa Mungu wa haki kwa dhambi (iliyogusiwa jana) kama vinavyoweza kuelezea kwa Yesu (*Mk.* 3:5, *Ufu.* 6:16). Kinyume chake, tunahimizwa “kuwa wepesi wa kusikia, bali si mwepesi wa kusema; wala kukasirika; kwa maana hasira ya mwanadamu haiitendi haki ya Mungu” (*Yak.* 1:19, 20). Kijicho kinamtakia mwingine mabaya. Uzushi upo kwa ajili ya kukashifu. Paulo pia anashutumu lugha ya matusi na chafu. Hatimaye, kuambiana uongo kunakatazwa (*linganisha Mambo ya Walawi* 19:11, 18), “kwa kuwa mmevua kabisa utu wa kale pamoja na matendo yake” (*Kol.* 3:9).

Paulo anamaanisha nini kuhusu “mtu wa kale” tofauti na “mtu mpya”? Tazama Warumi 6:6 na Waefeso 4:22–24.

Vitenzi anavyotumia Paulo kwa badiliko hili kutoka katika utu wa kale hadi utu upya vinadokeza mavazi, kana kwamba mtu alivua nguo kuukuu chafu na kuvikwa nguo mpya nyeupe (*linganisha Zek.* 3:4). Tofauti ya kale/mpya kama hiyo inawekwa kuhusiana na agano la kale na jipya, yanayoelezewa mtawalia kwa andiko la nje la sheria na kwa sheria iliyoandikwa na Roho moyoni (*2 Kor.* 3:4–18).

Sitiari hizi zinaeleza uongofu na matokeo yake, ambao Paulo anauita “kiumbe kipya” (*2 Kor.* 5:17). “Unaofanywa upya upate ufahamu sawasawa na mfano wake yeye [Kristo]” (*Kol.* 3:10), ambaye ni mfano wa Mungu asiyeonekana (*Kol.* 1:15). Kupata ufahamu wa Kristo kwa njia ya Neno Lake kunatufanya upya “tufanane na mfano uo huo, toka utukufu hata utukufu” (*2 Kor.* 3:18). Hili linatuweka juu ya mipaka yote ya kikabila, kijiografia na kijamii (*Kol.* 3:11), kwa sababu sisi ni raia wa ufalme wa juu.

Mwenendo wa Maisha Mapya

Baada ya kueleza mwenendo mbaya na sifa mbaya vinavyoondolewa na kuachwa tunapomjia Kristo, Paulo anaendelea na sifa njema—kama kuhama kutoka gizani kwenda nuruni.

Soma Wakolosai 3:12–14. Waumini wanaelezewaje, na unafikiri yanahusiana vipi na sifa wanazopaswa “kujivika”?

Kama Israeli, walioitwa na Mungu kuwa watu wake maalumu na kuakisi tabia Yake, wanaomwamini Yesu ni “wateule wa Mungu” (*Kol. 3:12*), “wateule” Wake. Si wote, hata hivyo, wanaoishi kulingana na wito huu. Kama Yesu alivyosema, “Waitwao ni wengi, bali wateule ni wachache” (*Mt. 22:14, linganisha na Mt. 24:22, 24, 31*). Rejea za Paulo kwa wateule zina maana zinazofanana (*Rum. 8:33, 2 Tim. 2:10*). Pia, kama Israeli, waumini “wanapendwa” na Mungu na “watakatifu” (*Kum. 7:6–8*). Fadhila hii inabeba jukumu muhimu: “kuzitangaza fadhili zake yeye aliyewaita mtoke gizani mkaingie katika nuru yake ya ajabu” (*1 Pet. 2:9*). Tunafanya hivyo kwa jinsi tunavyoishi sasa.

Sifa nane zinazotajwa na Paulo ni orodha ndefu! “moyo wa rehema, utu wema, unyenyekevu, upole, uvumilivu, mkichukuliana, na kusameheana,” na “zaidi ya hayo . . . upendo” (*Kol. 3:12–14*). Haya yanaweza tu kutoka katika moyo uliunganishwa na Kristo, kwa sababu yanaelezea tabia Yake na jinsi ambavyo ameshughulika nasi. Tunapaswa kuwasamehe wengine “kama Bwana alivyowasamehe ninyi” (*Kol. 3:13*). Upendo ni “kifungo cha ukamilifu” (*Kol. 3:14*), kwa sababu ni upendo Wake kwetu unaotufunga Kwake na kutuwezesha kuwapenda wengine kwa dhati (*1 Yoh. 4:11, 12*).

Sifa hizi zinaathiri uhusiano wetu kwa njia mbili. Kwanza, kuonesha upendo, rehema, utu wema na msamaha kwa wengine kunatubariki sisi na wengine. Inatia moyo kuwapenda na kuwabariki wengine. Watu kwa kawaida watatuitikia kwa wema, na tunaendelea kupokea rehema na msamaha wa Mungu (*Mt. 5:7, Mt. 6:14*). Pili, na muhimu zaidi, inamtukuza Mungu na inaweza kuwatia moyo wengine kumwamini na kumfuata Yesu, kwa sababu inaonesha uweza wa neema ya Mungu. “Hakuna mvuto mwingine unaoweza kuzingira roho ya mwanadamu kama nguvu ya mvuto wa maisha yasiyo na ubinafsi. Hoja yenye nguvu zaidi kwa upande wa injili ni Mkristo anayependa na kupendeka.”—Ellen G. White, *The Ministry of Healing*, uk. 470.

Unamwakilishaje Yesu vizuri kwa namna unavyowatendea wengine, hasa wale ambao wanaweza wasioneshe wema kwako?

Kuishi Maisha Mapya

Kujali kwa Paulo suala la amani na mapatano katika kanisa kunaonekana wazi katika aya za mwisho za Wakolosai 3. Tayari tumerazama amani ya Mungu kwa undani (*tazama Somo la 7*). Tofauti na amani ya Kirumi, amani ya Kristo si amani iliyolazimishwa kutoka nje bali inapaswa “kututawala” kutokea ndani. Hilo linaweza kutokea tu ikiwa Kristo anatawala.

Soma Wakolosai 3:16, 17. Ni nini hasa humwezesha Kristo kutawala, na muziki una nafasi gani katika hayo yote?

Lugha ina maelezo mengi sana. Inafananishwa na neno la Kristo linalofanya makao yake ndani yetu. Hilo linatokea tunaposoma Biblia kwa makini ili kusikiliza na kujifunza kutoka katika hekima ya Mungu. Inavyoonekana, ingawa kifungu cha Kiyunani kina maana nyinyi, muziki una nafasi/wajibu muhimu katika “kufundishana na kuonyana” (*Kol. 3:16*).

Lakini si tu muziki wowote. Paulo anatumia istilahi mahususi hapa na katika Waefeso 5:19: “zaburi na tenzi na nyimbo za rohoni.”

Ingawa hatuwezi kuwa na hakika, inaonekana tofauti inawekwa hapa kati ya mkusanyo uliopo wa zaburi za Agano la Kale na mkusanyiko unaoongezeka wa nyimbo za Agano Jipya. “Nyimbo za kiroho” inaweza kuwa istilahi ya jumla zaidi inayotumika kwa wimbo wowote wa sifa unaohusiana na maisha ya kiroho au maisha ya kanisa. Maneno ya nyimbo hizo ni njia ya kufundisha ukweli na kutoa maelekezo ya kuishi maisha mapya ya Mkristo. Nyimbo nyingi bora za karne chache zilizopita zina ujumbe wenye kutia moyo kwa namna yenye nguvu wa tumaini na uhakikisho, unaohitajika sana katika ulimwengu unaotushusha hadhi sote kwa urahisi.

Mvuto wa muziki una nguvu. Kupiga kinubi kwa Daudi kulileta matokeo ya kuburudishwa kwa Mfalme Sauli (*1 Sam. 16:23*). Lakini Daudi alipokuwa mpinzani wake, hasira na chuki ya Sauli viliinuka (*1 Sam. 18:10, 11*). Muziki dhati mtulivu umeoneshwa kitabibu kupunguza wasiwasi, kuboresha utendaji wa ubongo, kuongeza burudiko, kusaidia kupunguza maumivu na kuongeza kuchanganyika/kukaa na wengine.

Ni nani kati yetu ambaye hajajionea mwenyewe mvuto wenye nguvu ambao muziki, kwa wema au kwa ubaya, unaweza kuwa nao katika hisia na mawazo yetu? Muziki—muziki unaofaa—unaweza kuwa wenye kuinua kiroho.

Tunaambiwa kwamba chochote tunachofanya, “fanyeni yote katika jina la Bwana Yesu” (*Kol. 3:17*). Je, unaweza kusema kweli kwamba unafanya hivyo? Ikiwa sivyo, unawezaje kubadilika; yaani, ni lazima uache kufanya nini ikiwa huwezi kufanya kwa jina la Bwana?

Jifunze Zaidi: “Roho wa Mungu anapoutawala moyo na akili, moyo ulioongolewa hulipuka kwa wimbo mpya, kwa kuwa mtu huyo hutambua kwamba katika uzoefu wa maisha yake ahadi ya Mungu huwa imetimizwa, na makosa yake huwa yamesamehewa, na dhambi zake huwa zimefunikwa. Huwa ameonesha kumwendea Mungu kwa toba kwa ajili ya kuivunja sheria ya Mungu, na imani kwa Yesu aliyekufa ili mwanadamu ahesabiwe haki. “Basi tukihasabiwa haki itokanayo na imani” “atakuwa na amani kwa Mungu, kwa njia ya Bwana wetu Yesu Kristo.” Warumi 5:1.

“Kwa sababu ya uzoefu huu wa maisha, haimpasi Mkristo kukunja mikono bila kufanya chochote akiwa ameridhika na kazi iliyokwisha kufanyika na kukamilika kwa ajili yake. Yule aliyenuia kwa dhati kuingia kwenye ufalme wa kiroho ataona kuwa nguvu zote na shauku kubwa sana ya kupenda mambo ya moyo usiofanywa upya, yakiungwa mkono na nguvu za ufalme wa giza, huwa vinapangwa dhidi yake. Kila siku inampasa kufanya upya kujitoa kwake, kila siku kupambana na uovu. Tabia za zamani, mielekeo ya kurithishwa ya kutenda dhambi, itamkabili ili kumtawala, na dhidi ya mambo hayo itampasa daima kujilinda, akijitahidi kwa nguvu za Kristo ili kupata ushindi.

“Nguvu ya maisha ya juu, maisha safi, na yenye uadilifu ndilo hitaji letu kubwa. Ulimwengu umefurika dhana na maneno yetu, na ufalme wa Mungu ni kidogo sana miongoni mwa watu.

“Katika juhudi zake za kutaka kufikia kanuni iliyo njema ya Mungu, Mkristo hana sababu ya kukata tamaa kwa lo lote. Kukamilishwa kimaadili na kiroho kwa njia ya neema na uweza wa Kristo vimeahidiwa kwa watu wote. Yesu ni chimbuko na nguvu na chemchemi ya uzima ... Na kwa niaba yetu, huwapanga kazini mawakala wa mbinguni wenye uweza wote. Katika kila hatua huwa tunagusana na uweza wake ulio hai.”—Ellen G. White, *Matendo ya Mitume*, Sehemu ya Pili, uk. 153, 154.

Maswali ya Kujadili:

1. Uzoefu wako mwenyewe umekuwa je kuhusu ahadi kwamba “umehesabiwa haki kwa imani”? Ahadi hii ya kushangaza imebadilishaje maisha yako? Ahadi hiyo inahusianishwaje na wazo kwamba wewe pia “umefufuliwa pamoja na Kristo”?

2. Inamaanisha nini kwako kuwa na mtazamo wa mbinguni? Je, ni muhimu zaidi kuliko kutenda mema duniani? Usawa uko wapi?

3. Fikiria juu ya aina ya mvuto ambao maisha yako unao kwa wengine. Ingawa tunaelekea kufikiria hili katika muktadha wa mvuto wetu binafsi, vipi kuhusu mvuto wetu kama kanisa? Kanisa lako mahalia linaigusaje jamii yako mahalia?

4. Soma Wakolosai 3:11. Hili linapaswa kutuambia nini kuhusu umoja tunaapaswa kuwa nao katika Kristo?